

列傳第七十四

循吏

北史八十六

張膺

路邕

閻慶胤

明亮

杜纂

竇瑗

蘇淑

張華原



孟業

蘇瓊

路去病

梁彥光

樊叔略

公孫景茂

辛公義

柳儉

郭絢

敬肅

劉曠

王伽

魏德深

先王疆理天下司牧勅元刑法以禁其姦禮教
以防其欲雖爲政以德理寔殊途百慮一致在
斯而已書云知人則哲又云無曠庶官言非其
人爲空官也叡哲之后必致清明之臣昏亂之
朝多有貪殘之吏嗜欲所召影響從之故五帝
三王不易人而化皆在所由化之而已蓋有無
能之吏無不可御之人焉自罷侯置守歷年永

久統以方牧仍世相循所以寬猛爲用庇人調
俗但廉平常迹聲有難高適時應務招響必速
是故搏擊爲侯起不旋踵懦弱貽咎錄用無時
此則已然於前世矣後之爲吏與世沉浮叔季
澆漓姦巧多緒居官莅職道各不同故往籍述
其賢能以彰懲勸之道案魏立良吏傳有張恂
鹿生張膺宋世景路邕閻慶胤明亮杜纂裴他
竇瑗羊敦蘇淑齊立循吏傳有張華原宋世良
郎基孟業崔伯謙蘇瓊房豹路去病周書不立

此篇隋循吏傳有梁彥光樊叔略趙軌房恭懿
公孫景茂辛公義柳儉劉曠王伽魏德深其張
恂鹿生宋世景裴他羊敦宋世良郎基崔伯謙
房豹趙軌房恭懿各附其家傳其餘皆依時代
編輯以備循吏篇云

張膺不知何許人也延興中爲魯郡太守履行
貞素妻女樵採以自供孝文深嘉之遷京兆太
守清白著稱得吏人之忻心焉

此篇陽平人也宣武時除東魏郡太守蒞政清

勤經年儉日出家粟賑賜貧窘靈太后下詔褒
美賜龍旣馬一匹衣一襲被褥一具稍遷南青
州刺史卒

閻慶胤不知何許人也爲東秦州敷城太守頻
年飢儉慶胤歲常以家粟千石賑恤貧窮人賴
以濟部人陽寶龍一千餘人申頌美政有司以
聞靈太后卒無褒賞

明亮字文德平原高昌人也有識幹歷員外常
侍延昌中宣武臨朝堂親自黜陟授亮勇武將

軍亮進曰臣本官常侍是第三清今授臣勇武其號至濁且文武又殊請更改授帝曰九流之內人咸君子卿獨欲乖衆妄相清濁所請未可亮曰今江左未賓書軌宜一方爲陛下投命前驅拓定吳會官爵陛下之所輕賤命微臣之所重陛下方收所重何惜所輕因請改授平遠將軍帝曰運籌用武然後遠人始平卿但用武平之何患不得平遠乎亮乃陳謝而退除陽平太守清白愛人甚有惠政轉汲郡太守爲政如前

舉宣遠近卒二郡人吏迄今追思之

杜纂字榮孫常山九門人也少以清苦自立時
縣令齊羅喪亡無親屬收殮纂以私財殯葬由
是郡縣標其門閭後居父喪盡禮郡舉孝廉稍
除積弩將軍從征新野及南陽平以功賜爵并
陞男賞帛五百匹數日之中散之知友時人稱
之歷武都漢陽二郡太守竝以清白爲名明帝
初拜清河內史性儉約尤愛貧老問人疾苦至
有對之泣涕勸督農桑親自檢視勤者賞以物

帛愷者加以罪譴弔死問生甚有恩紀除東益
州刺史無御邊威略群氏反叛以失人和徵還
遷太中大夫正光末清河人房通等三百人頌
纂德政乞重臨郡詔許之孝昌中爲葛榮圍逼
以郡降榮以爲常山太守榮滅卒於家纂所歷
任好行小惠疏食弊衣多涉誣矯而輕財潔已
終無受納爲百姓所思號爲良守天平中贈定

州刺史

竇瑗字世珍遼西陽洛人也自言本出扶風平

陵漢大將軍武曾孫崇爲遼西太守遂家焉曾
祖堪慕容氏漁陽太守祖表馮弘成周太守入
魏父罔舉秀才早卒普泰初瑗啓以身階級爲
父請贈詔贈平州刺史瑗年十七便荷帙從師
遊學十載始爲御史後兼太常博士拜太原王
介朱榮官榮留爲北道大行臺左丞以拜榮官
賞新昌男從榮東平葛榮封容城縣伯瑗乞以
容城伯讓兄叔珍詔聽以新昌男轉授之叔珍
由是位至太山太守介朱世隆等立長廣王

爲主南赴洛陽至東郭外世隆等遣瑗奏廢之
瑗執鞭獨入禁內奏願行堯舜事曄遂禪廣陵
由是除給事黃門侍郎孝武帝時爲廷尉卿及
釋奠開講瑗與溫子昇魏季景李業興並爲擢
句天平中除廣宗太守政有清白之稱廣宗人
情凶戾累政咸見告訟唯瑗一人終始全潔轉
中山太守聲譽甚美爲吏人所懷及齊神武班
書州郡稱瑗政績以爲勸勵後授平州刺史在
州政如臨郡又爲神武丞相府右長史瑗無軍

府斷割才不甚稱職又行晉州事及還鄴上表
曰臣伏讀麟趾新制至三公曹第六十六條毋
殺其父子不得告告者死三反覆之未得其門
何者按律子孫告父母祖父母者死又漢宣云
子匿大父母皆勿論蓋謂父母祖父母小者攘
羊甚者殺害之類恩須相隱律抑不言法理如
是足見其直未必指毋殺父止子不言也今毋
殺父而子不告便是知毋而不知父識比野人
義近禽獸且毋之於父作合移天既殺已之天

復殺子之天二天頓毀豈容頓默此母之罪義
在不赦下手之日母恩即離仍以母道不告鄙
臣所以致惑如或有之可臨時議罪何用豫制
斯條用爲訓誡恐千載之下談者誼譁以明明
大朝有尊母卑父之論以臣管見實所不取詔
付尚書三公郎封君義立判云母殺其父子復
告母母由告死便是子殺天下未有無母之國
不知此子將欲何之既於法無違於事非害宣
布有司謂不宜改瑗復難云局判云母由告死

便是子殺天下未有無母之國不知此子將欲
何之瑗案典律未聞母殺其父而子有隱母之
義既不告母便是與殺父同天下可有無父之
國此子獨得有所之乎事雖停寢除太宗正卿
宗室以其寒士相與輕之瑗案法推正甚見讎
疾官雖通顯貧窘如初清尚之操爲時所重領
本州大中正兼廷尉卿卒官贈太僕卿濟州刺
史謚曰明

蘇淑字仲和武邑人也兄壽興坐事爲閹官後

拜河間太守賜爵晉陽男及壽興將卒遂冒養
淑爲子淑熙平中襲其爵後除樂陵內史在郡
綏撫甚有人譽後謝病乞解有詔聽之吏人老
幼訴乞淑者甚衆後歷滎陽中山二郡太守卒
淑清心愛下所歷三郡皆爲吏人所思當時稱
爲良二千石武定初贈衛大將軍都官尚書瀛
州刺史謚曰懿齊神武追美清操與羊敦同見
優賞

張華原字國滿代郡人也少明敏有器度初爲

齊神武驃騎府法曹參軍賜爵新城伯累遷大
丞相府屬深被親待每號令三軍恒令宣諭意
旨尋除散騎常侍周文始據雍州神武使華原
入關說焉周文謂曰若能屈驥足於此當共享
富貴不爾命懸今日華原曰殞首而已不敢聞
命周文嘉其亮正乃使東還尋悔遣追不及神
武以華原久而不返每歎惜之及聞其來喜見
於色後除相府右長史遷驃騎大將軍特進進
爵爲公仍徙封新安後爲兗州刺史華原有幹